

NANOIDE SAN PABLO TIMOTÉOMO ORÉCABE

Primera Carta del Apóstol San Pablo a Timoteo

Pablo Timotéomo cuete

1 ¹Páblodicue. Jesucristo ocuícamedicue. Cai Jíllotaraima Juzíñamui cai Ocuíraima Jesucristo diga íaillinoi daina uaido orécacue. Afe Jesucrístodo cai ñue illífue abí úiñoticue. ²Juzíñamui uai coco íinogafuemo nahí cue jító izóidío. Ie jira bibe omo cueticue. Cai Moo Juzíñamui íemo ñue cai Ocuíraima Jesucristo diga o ézicillena iere jítáidicue. Daje izóí afe íaillinoi omo dúecaillena jítáidicue. Iemona afe íaillinoi o comeci ñue uái íllena óiacadicue.

Jíáimaci íaioi taino lluáfuiaido o jífueñeillena abí o rairuirí

³Nauí Macedóniamo cue jailla llezica Efeso jófuemo o fiébillena izire jicádicue. Aféruido afénomo o fiénocaidicue, afénomo itínuiaimona dáarie taino llófuiana íaioina o rairuíllena. ⁴Daje llezica íaioi jaiái ninomo lloga ráfuiái naa jagai diga, áfena íaioina júfidotañeítioza. Íaioi jaiáigima lloga fuiñede ráfuiái llúana ráiruitioza. Nana bífuiái taino lluáfuiaimo cai comécina uite. Mei íadi nana bífuiái Juzíñamui caimo jóonega íemo cai íinogafuena ñue ícoimo fuitáñede.

⁵Juzíñamui caimo jóonega llujíllifue bie izóí joide: Illa dígamie conímana ñue izíruiédicai. Afe bie izíruiilla íainide comécimona comuide. Daje izóí afe izíruiilla comeci ñue úrillamona comuide; bie izíruiilla afe izóí jíáimana jífueñede Juzíñamuimo íinogafuemonona comuide. ⁶Bie ñue izíruiillafue díbenemona dáarie oni táífodo jáidiaioi. Afe taino llua íinota oni jíáífodo féiraitiaioi. ⁷Afémaci Juzíñamui lletara uai llófuetinona jáiacadiaioi, mei íadi dani íaioi daina uaina onóñediaioi. Iocire llófuetiaioi íadi íaioi llócaiga uaina ñue baitáñediaioi.

⁸ Juzíñamui lloga lletara uai ñüeraza onódicaí. Búuaido Juzíñamui naga come lletállena mamérite. Dámie Juzíñamui mamérilla izói afe uaimo coméciadi ñüera. ⁹ Afe lletara uai ja ñüefuiai finófiredinomo llóñega. Afena ñue onódicaí. Mei jiáífodo fiénide comínimo mameca. Bie izoide comínimo Juzíñamui lletara uai dúide. Afe comini illaima lloga uaina uáitafirediaioi. Ocuícana náfueñediaioi. Fiénidifuenta finófirediaioi. Daje izói fiéniruidinona itáioi. Afe izói Juzíñamuina jacíruíñediaioi. Daje izói Juzíñamuimo ñnogafuemo náfueñediaioi. Iemo Juzíñamui lletara uai, moo ei diga fatínomo dúide. Daje izói comínina titáfiredinomo dúide. ¹⁰ Afémaci naga ringomo fieni comeci fácajano iáire finófirediaioi, afémaci áirediaioi íadi. Daje izói jiáie íimana iáire finódiaioi. Juzíñamui lletara uai nana bie izoide comínimo dúide. Daje izói cómena llaitádinomo dúide. Táinona úrifiredinomo dúide. Daje izói uafue daíllena táinomo Juzíñamui mámece llínotinomo dúide. Iemo Juzíñamui lletara uai nana jiáífodo jífueñede llófuiafuenta uáitafiredinomo dúide. ¹¹ Afe bie jiáimacina jífueñede llófueinafue Juzíñamui cuemo llogafue daje izói jóoide. Juzíñamui cuemo lloga uai nana comini ñue jíllona uai. Afe uai oni comínimo cue llujállena, iere ñüera Juzíñamui jónegacue.

Juzíñamui cuena dúecaillari iere figura daidicue

¹² Cai Ocuíraima Jesucristona “Figura” daidicue, mei afémie ie uai jino cue llujáille rínona cuemo ígaza. Juzíñamui cuemo comécido facade: O táijínana fáicanocaiñeno ñue fuitáfiredio, daide. Jira bie uai llujáille táijállena Juzíñamui cuemo jónete. ¹³ Jaiai uíecodo Juzíñamuina iáire daíífiredicue. Daje izói íemo ínotinona duere finóllena racáfiredicue. Afe llezica cue uaido Juzíñamuina icídicue. Bífuaíaido Juzíñamuina duere finódicue íadi, ja birui afe Juzíñamui nana bie ñüefuiai cuemo jónete. Jaiai aféruillaído ie uaimo cue ínoñena jira Juzíñamui iere cuemo dúecaide. Daje izói cue fínuafue cue onóñena jira cuemo dúecaide. ¹⁴ Iemona cai Ocuíraima iere ñue cuena ézicite. Daje llezica Cristo Jesumo dájena cai jaináinado aillo íemo ñnogafue naa ie izíruillafue diga caimo comuide.

¹⁵ Bie izóidífue iere uafue. Nana áfemo ínoredicaí. Bífue bie izói daide: Cristo Jesús fiénidino jíllotallena ana bíniemo bite. Afe fiénidinomona cue iere jamánomoina. ¹⁶ Mei daí íticue íadi Juzíñamui iere cuemo dúecaide. Are íllamona Juzíñamui cuemo dúecaillado náiraímo Jesucristo ie ñue comeci mánainafue cuedo jino íaíoimo cíotate. Iemona comínimo ñüefuiai ja cíotatimíena jáidicue, mei fiénidífuaíarede Páblodicuemo Juzíñamui iere dúecaideza. Jesumo cue ínuamona cue comeci ífuenta méidotícue. Afena onóíllamona nana zííñona illífue óiacadino, cue comeci ífue méidua izói, afe izói afémaci afémiemo ínota íaíoí comeci ífue ñüefuena méidoitiaioi. ¹⁷ Ie jira jaca tííñede buna

cióñena Juzíñamuina ióbitaacadicaí. Afémie daade Juzíñamui, daje izói nana ráfuiaina onódimie. Afe zíñona Jamánomoidillaimamo ñue ebírede uai jaca nágarui íemo jóneticaí. Daíí jóoide.

¹⁸Cue jitó Timoteo, bifue omo jóneticue. Riire fuirídímie izói o iri. Naui Juzíñamui mámecido odo úritino, ñue o illifue llotíaioi. Afémaci daina izói mai birui o ínori. O comeci úrillafue ñue o jóoneri. ¹⁹Dámierie íaioi comeci úrillafuena náfuēnamona nocáe buíllamona táinocailla izói, íaioi íinogafuemona oni táinocaidiaioi. ²⁰Himenéomo Alejandro díga afe izói comuide. Ie jira afe íaillinoi Taifemo izájidicue, Taife anamo íaillinoi daíí zefuúllena. Dinomo Juzíñamui jánana úriñeillena ónoitiaillinoi.

Juzíñamuimo cai úrilla lluafe

2 ¹Fueñe ona dáitícue: Mai nana comini íena Juzíñamuimo o jicáfireiri. Afena Juzíñamuimo ínotinona o lloiri. Iemo jíái, izire comínimo ie dúecailleza mai jicari. Daíí nana comini íena Juzíñamuimo o úrifireiri. Afe llezica nana comínido afémiena iere figora o daíífireiri. Daíí féitañeno nana comínido Juzíñamuimo ñue úrifireiri. ²Gobierno oreca omoí úíñotímie íena Juzíñamuimo jicáredio, naa jíáie jaboide illaini díga. Afémaci íena izire o jicari, áfedo nífuenino caimare cai íllena. Daje izói comeci ñue uái illáfuemo íredicaí. Afe daíí cai jícamona nana cai illáfuena Juzíñamuimo ñue mámeiticaí. Daje izói conima díga comécina ñúeíticaí. ³Bifue iere ñuera, cai jíllotafirede Juzíñamuina ñue ióbitade. ⁴Mei afémie comeci jitáinafue nana comínina jíllloiri, daide. Daje izói afémacina ua ráfuena onoiri, daide. ⁵Cai Juzíñamui jaca dáadeza. Daje izói Juzíñamui erícana caina ñue finódimie caido úritímie daade. Afémie Jesucristo. Afémie íaifuenidímie íadi, cai izóidímie. ⁶Juzíñamui mamécaruimo dúciamona Jesucristo ie abina éeruiñeno nana cai jíllloillino íbana izájiga. ⁷Iemona nana judfoñedinomo afe Juzíñamuimo ínolle ua ñúefue cue llófuiaillena orécacue. Daíí jíllona uai llujífiredimiena jónegacue. Crístomo cue ínuamona táinofue lloñédicueza, uafue llotícue.

⁸Ie jira náragobiaido naga cómena: Juzíñamuimo omoí úrifireiri, daidícue. Ñue nífuenide comécido omoí jicari. Jíáímamo rícaíñeno comécido Juzíñamuimo omoí úriri. Daje izói dani ómoímo júfidoñoeno comécido íemo omoí jicáfireiri. ⁹Daje izói ringóniai iniroi jitállífue llóitícue. Jabóidingo ringo jita izói, naga ringo jítaiteza. Íima jiruúdollena jíta abina cíoitae iníroina, jítañeno iri. Daje izói comini cfodollena ífótirai jamánomo ebire finóñeno iri. Jabo ífo jua figona. Daje izói quenírede raana aillo jíroñeno iri, naa jamánomo ráífide iniroi díga. Jámaicuro jítaóirena. ¹⁰Mei jíáífodo comínimo dúecailla ñúefuiaido naga ringo finóbiri, naa jíáie caimare uáiduafuai díga. Mei nana Juzíñamui

feiena ñue finódogango bie izói íteza. ¹¹ Ringóniai llófueinamo uai oñeno cacáreitiaoiza. Comeci mánainafuedo afe uaina onócaitiaioi. ¹² Nairai cígiri ringo llófuellena rairuídícue. Ringo íimana anáfenotañedicue. Mei jíáifodo, ringo iima anamo úriñeno uái iri, daidícue. ¹³ Mei Juzíñamui nano fueñe Adán finódeza, afe méifomo Eva finode. ¹⁴ Adán jífueña, mei íadi ringo Taife jífuega. Iemo jífuefillamona afengo fiénidifuemo baíide. ¹⁵ Mei íadi naga ringo Juzíñamuimo íinogafuemo jeire oíadi, íemo ei ocuícáfuiái ñue ícoimo fuitáadi afengo jíllolite. Afe llezica afengo naga cómena izíruirede. Iemo começi ñue ínuafue dibénemo írede. Daje izói ñue jáicina macállifuemo írede.

Ocuídillainimo jítaírede ñue illafue Pablo llote

3 ¹ Ja cue lollífue iere ua rafue. Dámie ocuídillaimana jáiacade ñuera. Afe izói tájiacanafue ñuera. ² Ie jira afe izoide ócuitillaima mamécamié jáicina ñue írede. Afémie nífuenino macárede. Afe daí afémie mácafue jáíamie lletánide. Afémie daango ótena figura. Ménango ónide. Afémie comínimo lloga uaido jífánodoínide. Daje izói ráfuenta ñue baitádimiena írede. Naga come afémiena caimare jacíruirede. Daje izói nana afémiemo mácaibitínona afémie jíáifodo coméciñeno ñue caimare uáidorede. Iemo jíáimacina caimare llófuerede. ³ Afémie jaca jífáinide. Daje izói afémie fuírínide. Come jífuiamona oga úcubena, afémie llíinonide. Mei jíáifodo jeruñeno raana fecáfirede. Iemo começi ñue uái illafue dibénemo írede. “Aillo úcubena cue olli” daíñide. ⁴ Dama ie jofe ero comíni ñue ocuírede. Dama ie úrue ñue raire cacáfireillena lletárede. Daje izói ie úrue jáíae eicomínina ñue jacíruitarede. ⁵ Dámie ie jofona ocuállana ónoñeniadi, ¿mei nie izói Juzíñamuimo gairíracona ócuíte? ¡Ocuínide! ⁶ Ie jira como fueñe Juzíñamuimo ínotímie, Juzíñamui ico ocuídillaimana ínide. Como fueñe Juzíñamuimo jáináitagamié raire illáimana jóoniamona afémie iere abina ínoite. Iemo fiene abi ínuamona, Juzíñamui Taife ana duere finóllifuemo dótaja izói, afe izói bímie daí zéfuite. ⁷ Afe Juzíñamui ico ocuídillaima ñue jacíruigamiéna írede. Afémie daí íllamona, Crísto mo nai ínoñedíno ñue íena úritiaioi; ie jánana fiene úrinidiaioi. Afémie afe izói írede, meáfue dibénemo ie íneillena; daje izói Taife uai íena jíitañeillena.

Jabóidillainimo jítaírede ñue illafue

⁸ Daje izói comíni dínenana nana jabóidillaini ñue jacíruiganona írediaioi. Daje izói ie úrilla uai jíáifodo méidonide. Iemo afémie jífáinide. Daje izói come jífuiamona oga úcubena llíinonide. ⁹ Afe izói cai ínollena jino lloga ua ráfuenta afémie fáicanocaiñeno jeire órede. Daje llezica afémie começi úrilla uai nífuenino írede. ¹⁰ Afémaci ñuera daííllena facátagamacina írediaioi. Facata mei íaioi nífuenia jabóidillainina írediaioi. ¹¹ Daje izói

aféllaini finódogango ñue jacíruigangona írediaioi. Daje izói aféngotiai jíáimamo fiénidifuenta íaioimo llónidiaioi. Iemo lloga uaido jíáimamo jífánodoindiaioi. Aféngotiai nana ocuica raana fáicanocaiñeno fuitárediaioi. ¹²Afe jabóidillaini dáangona áiredena figura. Ménango ónide. Daje izói íaioi úruaiana ñue ocuírede, naa íaioi jofo ero comíniri. ¹³Naga jabóidillaíma íaioi táijiana ñue fuitáдино ñúefuena otíaioi. Comini iere ñúefue íaioimo jóneitiaioi. Daje llezica íaioi Cristo Jesumo íinogafuena jamánomo meáiruñeno llórediaioi.

Cai íinoga jaiái báinino llogafue ja jino uáfodo denode

¹⁴Raire o éroizaillena coméiidicue. Nai cue biñena llezica, bibe omo cueticue. ¹⁵Mei nai are cue biñéna llezica, Juzíñamuimo jaináidimie jitaiga ñue illífuena o onóillena llóiticue. Afe Juzíñamuimo jaináidino caade Juzíñamuimo ínotino. Afémaci Juzíñamui ua ráfuena ñue riire úíñotiaioi. Jofo riire mozíoide jáillirai izóidiaioi. Ie jira afe rafue uaina oni caitánide. ¹⁶Jaiái báinino lloga cai íinogafue iere jamánomo ebírede; nana comini ja uáfodo onoga. Be níuui:

Juzíñamui cai cígimo cómena jéiciaibite. Ñuera Joreño afémiedo úrite; daide: Bímie comécina jáicinaidimie, daide. Afémie Juzíñamui abi imácimo ácatagamie. Diga náiraiáido ie illafue llócaide. Bíníemo aillo comini íemo ínotiaioi. Afe mei afémie caífo monamo abido uiga.

Juzíñamuimo íinogafuena féitaitino ífue

4 ¹Ñuera Joreño jino caimo uáfodo llote, írairuillaido dámierie íaioi íinogafuena féitaitiaioi. Féitajano cómena jífue jóríai jítaínaíuiai jeire óitiaioi. Daje izói Taífemo jainaide fiénide jóríaimona onóigafuemo ínoitiaioi. ²Afe izói, comeci ífuena jíáífo jóidino llógana cacáreitiaioi, naa táinona úrillafuairi. Afe bie jífuefiredino ja íaioi ífoci úrillafuena ja niné féideza. Uzírede llojédamo uzide onoi cacáñena izói, bie comini itíaioi. ³Bie Juzíñamuimo íinogafuena féitate comini jíáimaci áirenana rairufúdiaioi; daje izói ringona: “Ínreiri,” daíñediaioi. Daje izói ñuera cai güillemona dáarie: “Güíñeno,” daidíaioi. Mei íadi afe bie güille Juzíñamui comuítaga, íemo ínotino ecállena, naa ñúefuena onódinori. Afe güílleri íóbillano Juzíñamuina “Íere figura” íemo jaináidino daírediaioi. ⁴Mei nana Juzíñamui íinoca güille núeraza, bacánide. Iemono afémie caimo fecaca raana oni fáinidícai. Mei jíáífodo Juzíñamuina “Íere figura” daínano, nana ñue llíñoredícai. ⁵Juzíñamui uai afe güíllena ñue ínode. Daje izói íena figura cai daííirena afe cai güíllena ñue ínode.

Jesucristo ñue ocuícamié bie izói írede

⁶Bífuiai cai ámatiaímo o llófueia Jesucristo ñue Ocuícamiéna íitío. Afe bie llófueinaíue jeire o oía bie ínofírega uai dama ñue ona comécina

náiretaite. O jeire oga uaido ñue riire íitio. ⁷Mei íadi bie fiénide énie ie ráfuiaina náfuéño o iri, naa jiáie taino jagai izóidifuiari. Juzíñamui illa izói o íacanamo áfemo nágarui o comeci lílicitairi. Afedo riire íitioza. ⁸Cai abi cai ríireta, daa bínie ífuemo caina canode. Mei jiáifodo Juzíñamui illa izói íllena cai nícidoia naga ñúefuemo caina canode. Daií cai íllemona biruíllaido caina canode, íemo daje izói uire bíitifuemo jaca caina cánoite. ⁹Bifue iere nahí ua ráfueza, nana áfemo ínorediaioi nana cáioiri. ¹⁰Afe bifue jira iere comeci fácaíticai. Iemo áfemo zéfuidicai. Ua zegóruoicana ñéfidicai. Mei ñue cai íllena caade Juzíñamuimo ocuírídicaiza. Afe caade Juzíñamui nana comini jíllotaíbite. Iemo ínotino ja Jíllotatimie.

¹¹Bífuiaido nana comini o ocuífíreiri. Daje izói aféfuiai o llófueiri. ¹²O fia jitócomena jira comini o llófuiáfue jiáimana jámairuitatañoeno iri. Mei jiáifodo ñue Juzíñamui izói illafue Juzíñamuimo ínotinomo jino cótaitimiena íitioza. Ñue o úrillafuedo afémacina onótaitioza. Daje izói comini eróicana ñue o mácafuedo íaioina onótaitioza. Iemo naga cómena ñue o izíruillado íaioina ñue cánoítioza. Cristo izói o íllamona ñue íaioina llétaitioza. Daje izói Juzíñamuimo izire o ínogafuedo llófueítioza, naa o comeci íáinidifuiari. ¹³Naí cue dúciñena llezica, Juzíñamui cuela uaillai comínimo o facádoíreiri. Daje izói cai ámatiaina o íocíretari. Afémacimo ñue o llófueíreiri. ¹⁴Juzíñamui omo iga o fibíllafuiái fáicanocaiñoeno o iri, mei nauí Juzíñamuimo gairííredino ocuídillaini Ñuera Joreño daina izói, íaioi onoi omo bitádiaioiza.

¹⁵Bífuiaina fáicanocaiñoeno o finóíreiri, o jamánomo jiáino baímo íaioi onóilleza. ¹⁶O illafue ñue abi o rairuiri, naa jiáino o llófuiáfueiri. Fáicanocaiñoeno riire abí o mameri. Ñue ímana o comuíllezza. Bie cue daina izói o íadi, o jíllotio, naa o uaimo cacáreidinori.

Crístomo ínotino uícomo ñue o illifue

5 ¹Eicomemo lléjecaiñoeno o iri. Mei jiáifodo o moomo o llófuiái izói fáicana o lloíri. Jiáie jitócominina nahí o ama izói llófueiri. ²Ríngóniaina jéngotiaína dama o ei izói llófueiri. Daje izói jitáingotiaína nahí o miringo izói o llófueiri. Íaioimo ñue comeci o facáíreiri.

³Uáfueña raana jitaide fecíngotiaína ñue o canori. ⁴Mei íadi jiáie jítorede daje izói enáizeñorede fecínguai ite. Afe úruiai íaioi éitiaína uzúngotiaína fueñe ñue úíñorediaioi. Daje izói nahí ie enáizeño dani íaioi uzúngona úcairediaioi, mei naga jító enáizeño díga íaioi móotiaína izíruirediaioiza. Afe bie izói illáfueimo Juzíñamui ñue íóbideza. ⁵Ie mei cómenide ua fecíngo, dango Juzíñamuimo ñue ie finóllifue ocuíríde. Daje izói Juzíñamuimo ie úrillafueña naio mona díga afengo fáicanocaiñede. ⁶Dango ie comeci gáina izói fecíngo ite. Caade íadi Juzíñamui díbenemo tíde izoide. ⁷Bífuiaina íaioi o ocuiri, lletánidíngotiaína íaioi ílleza.

⁸Dámie ie nahí come úicaillana ráairuia ie ínogafue táinomo jifánofide. Dama nahí comínimo ite duéredinona úicaiacañedimie, Juzíñamuimo íinoñedino fiénina baimo, afémie fiénide.

⁹Fecíngotiai íena mámece illabe fínoitio. Bie izói ñuera fecíngotiai mámece afébemo cúerena. Sesenta fimona ite fecíngo mámece cúerena. Afe bie fecíngotiai, daje izói dámiena ínredíngona írediaioi. Afe ízoidíngo mámece cúerena. ¹⁰Iemo jíái ie illafue ñúeinamona jalléidíngo afengo mámece cúerena. Iemo jíái úruiai ñue comútatíngo mámece cúerena. Jicana jíáima ie jofomo dúcia caimare uáidofíredíngo mámece cúerena. Iemo jíái Juzíñamuimo ínotinomo rairuñeno comece mánainado canófíredíngo mámece afébemo jóonerena. Mei afengo naga jíáima cánuana idai jócua izóidena caimare finófíredeza. Iemo jíái duere zefuide comini canófíredíngo mámece cúerena. Daje izói nana jíáie ñúefuiai finódíngo mámece jóonerena. Bie izóidífuiai nana daje fecíngo finórede; ímona afengo mámece cúerena.

¹¹Mei íadi sesenta fimona jofófenemo ite fecíngo mámece jóoneñoeno iri. Mei aféngotiaimona dáarie dani íaioi comece óiacanamona nibai Crístona zóofeítiaioiza. Zóofiano nane meine ínreiacadiaioiza. ¹²Daí íaioi illa dani íaioi ícoinia daí ite. Mei fueñe íaioi Jesucrístodo jáillena mamérellafue ja fáicanocaidiaioiza. ¹³Afe baimo naga comini jofodo jáicaidiaioi. Jáicailamona, “Fia táijiñoeno daí cue illi,” daidífuiai. Afe llezica jíáimana úridoicana jáidiaioi. Iaiomodo dúíñede jíáimacimo itífuiaimo gágutajífrediaioi. Comínimo ñue íñedífuiedo úrioífrediaioi. ¹⁴Ie jira nai fecínaite jíáíngona daidícue: Abído ínreiri. Ínreillano úruereiri. Daje izói jofu náangona ñue o iri, Taífemo jaináidíno ómoina úridoíñeilleza, daidícue. ¹⁵Mei fecíngotiaimona dáarie, Juzíñamuina féitano Taífedo jáidiaioiza.

¹⁶Crístomo ínotinomona daa cómemo úicaille fecíngo íadi, afe fecíngona dama afémie úicairede. Afe fecíngona Juzíñamuimo gairífredinona úicaitañoeno iri. Mei afe gairífredíno ua cómenide fecíngotiaína úicairediaioiza.

¹⁷Jesúmo gairídíno ñue ocuide éicomini, ñue táijídiaioiza ménacaíño íbárediaioi. Daje izói ñue íaioi tájínamona mai caimare íaioína omoi jacírui. Íere comini ñue llófuetíno, íere ñue lletádíno diga jíáie come íba baimo íbárediaioi. ¹⁸Mei Juzíñamui Cuegáuai daide: “Arroz izoide trigo, juráreto gájirillena záizía llezica, áfemona íaioi güilleza fue íbáiñoeno omoi iri.” Iemo jíáínomodo jíáífodo daide: “Naga tájítagamie ie tájínado ñue íbárede.”

¹⁹Fia da come ocuide éicomemo fiénidífué jóoneiadi, áfena náfueñoeno o iri. Mei íadi mena nibai daámami uai nabáidímie afe izói afe cómemo llóíadi, áfemo cacáreiri. ²⁰Ocuide eicomínimona dáarie fiénidífué finóadi, nana comini eróicana afémiena o áadori, nana jíáie comini

ñue abi jacínaificaillena. ²¹Juzíñamui eróicana, daje izói cai Ocuíraima Jesucristo eróicana bifue omo jóneticue. Daje izói Juzíñamui nizeca ie abi imaci eróicana omo jóneiticue. Nana bie omo cue lloga lletara uai ñue o náfuери. Nana comínimo dájerize jaícina o lloiri. Dámie oni eneno mámeñeitioza. ²²Dámie ie illafue nai figo onóñena llezica, ocuídillaimana ie o maméllena raire íemo o onoi bitáñeno o iri. Bie izói o íllado jiáimamo ite fiénidifuena raire nábaizaiñeitio. Naga íaifuiaimona oni o iri.

²³Mei o ero izírefireia daa jainoi jiróñeno o iri. Iemo due vínona o jirori.

²⁴Nai íaioimo riire jicánoñena llezica, comínimona dáarie íaioimo ite fiénidifuiai uáfori cíoide. Iemo jiáimacimo ite fiénidifuiai íaioi duere finoille mámia méifomo onórede. ²⁵Daje izói jiáie cómemo ite ñúefuiai uáfodo cíocaide. Iemo jiáimacimo ite ñúefuiai cíóñena íadi, díno íaioi diga báinino íñeite.

6 ¹Táijitafiregano íaioi ocuídimiaina ñue jacíruediaioi, jiáie comini Juzíñamui mámeçido fiени úriñeillena. Daje izói cai llófueinafuena fiени íaioi daiñeillena. ²Afe izói Crístomo ínote ocuífiredimiaina ñue jacíruediaioi. Juzíñamuimo ínogafuemo daje ámana íaioi maméiadi, nai ocuídímie ocuícamié diga conímána caimare jacíruediaioi. Mei jiáífodo afe Juzíñamuimo ínote ámamo, jiáimaci baimo, riire táijirediaioi. Afe riire táijina ínotino, afe ocuídino izíruiga ámatiai. Afémaci dáamací. Dájena Crístomo ínotino. Bifue o llófueiri. Daje izói áfedo o lletámairi.

Juzíñamuimo cai ínogana, “Figo baite” cai dáinana canode

³Afe bie cai Ocuíraima Jesucristo lloga jaícina jóide llófueinafuemo coméçíñedímie, oni jiáífodo táinofuiai llófuete. Daje izói cai ínoga ñuera uaina afémie figo jeire oñede. ⁴Daiítade come nífuena onóñedeza, táinodo abi ínote. Afémaci fia fiénide uáillaimo júfiduana iere gáidiaioi. Afe júfidogafuemoná aillo úradoillafue comuide. Iemo dájena caimare íñénafue comuide, íemo jiáimána éoinafue comuide, íemo jiáimána caimare uáidoñénafue comuide. ⁵Dáanomona féitañega fuiríllafuiai, jiáífodo oni coméçina jóidímacimo comuide. Bie comini ua ráfuena onóñediaioi. “Fia cai ínogafuedo iere cai ráanailli,” táinona coméçidiaioi. Bie izoide comínimona oni o iri. ⁶Ua onóigaza, cai ínogafue jamánomo ráífide. Juzíñamui caimo fecaca raana “Figo baite” daidímie, ie ínogafue ñue ráífide. ⁷Mei jii, bíniemo fueñe cai jocoina llezica minícana atíñedícaí. Afe izói uire cai tíia minícana úiñeitícaí. ⁸Mei biruimo cai caana llezica caimo ite gülleri, daje izói caimo ite iníroiri “Figo baite” daiñedícaí.

⁹Mei jiáífodo aillo ráanaiacadino fiени comeci fácafue dibénemo jáidiaioi. Afémaci aillo fiени comeci óiacanafuiaimo raamo jíríde izói

itíaiói. Bie izoide fieni óiacanafuiai cómena fieni finode. Daje izói íaiói illafue niné táinocaitate; jofu zabilla méino izói niné táinocaitate. ¹⁰Mei jii, úcubena izíruillafue nana fiénidífuiai comuillano aféfuiai jillaci. Dáarie iere izire úcubena óiacanamona, Juzíñamuimo íaiói íinogafuemonona oni nibéfodo jáidiaíoi. Afémaci dani íaiói illáfuenta táinona iere duere finódiaíoi.

Juzíñamuimo cai íinogana, fuirilla izói riire íredicai

¹¹Mei íadi o Juzíñamui nizécamiédioza, bie ailli cue lloga izóidífuiaimona oni o iri. Ñue comécina jáicina illáfue o mamériri. Juzíñamui illa izói mai o iri. Afémiemo ñue o ínofireiri. Jiáie comína ñue o izíruiri. Comeci járidoñeno o iri. Comécina mánaidimiena o iri. ¹²Mai Juzíñamuimo íinogafue o fuirilla izói nágaruillaido riire o iri. Juzíñamui omo iga ziiñona illafue ñue jeire o óiri, mei afemo Juzíñamui uáidogamiédioza. Afe Crístomo o íinogafuena comini cóicana jino llotio. Afe bie o llúamo o uai nabáidinona aillo ite. ¹³Ja birui Juzíñamui eróicana ona ñue ócuiticue. Afe Juzíñamui nana bíniemo itínuiaímo íaiói cáananona fecade. Daje izói Jesucristo eróicana ona dáititcue. Afémie daje izói ñúefue jino uáfodo llote. Poncio Pilato uícomo ie illáfuenta jáanoñeno llote. Daí Moo Juzíñamui, Jesucristo díga íaillinoi uícomo ona ócuiticue. ¹⁴Omo cue ocuícana, jáífodo méidoñeno, ñue jeire o óiri. Aféfuena ñue jeire o óiri, jiáíma ona lléañeiteza. Bífuiái ua Jesucristo billíruimo jeire o ófireiri. ¹⁵Juzíñamui jaiái uícomo mamécaruimo dúcia, Jesucristo cócaizabiteza. Afémie daade cai iere ñuera rínoide Juzíñamui. Daje izói afémie nana illáicomini ie Illáimaza. Daje izói afémie nana ocuífiredino Ocuídillaíma. ¹⁶Dama afémie jaca ziiñoza, tíñede. Afémie illano jamánomo meáire egáíñoteza, buna áinozinide. Afémiena jaca bu cóñede. Caade come jaca íena cónide. ¡Jaca ninomo ñúefuiai afe Juzíñamuimo nitácaza! ¡Aillue ñuera ríno jaca ninomo afémiemo dúideza! Aquíe izói íteza. ¹⁷Bie éniemo aillo ráaredino abi íaiói íñoñeilleza ñue o lloiri. Daje izói íaióimo ite raamo ócuiriñeitiaíoi, mei afe ráaniai are íñeitiaíoi. Mei jiáífodo: Dama Juzíñamuimo omoí ocuíriri, o daíri. Mei afe Juzíñamui ua cáadimie. Afémie jeruñeno nana cai jitailla raana cai cánuano caímo fecade. ¹⁸Afe ráanaitino ñue íaiói ílleza íaióimo ocuiri. “Omoí ñue íñoitífuiai ráanaitímoiza,” íaióina o daíri. “Omoí ite ráaniaimona jeruñeno jítáidinomo jiáífodo coméciiñeno fecari,” daí íaióina o daíífireiri. ¹⁹Daí íaiói íllamona, íco cómutííue nahí raana máíñoitiaíoi. Afe maíñóllena comécido ñue onódiaíoi. Afe dáaruído ziiñona illáfuenta óitiaíoi.

Íraicaiño Timotéomo jónenocafue

²⁰Timoteo, nana bie omo cue lloga ñúefuiai ñue o rairuiri. Bíniemo ite táinona úrioinafuiaímo cacáreiñeno o iri. Daje izói Juzíñamuina

uáitafuemo cacáreiñeno o iri. Mei íaiói: “Iere baitádicue,” daina uai taino uaiza. ²¹Mei bie izóidifuiái íinote cominí ja baie Juzíñamuimo íinogafuiaimona oni nibéfodo jáidiaioíza.

Mai, Juzíñamui ona ñue éziciiteza. Jae niie. Mai daiítadeza.